

თბილისის მერის, ბატონი დავით ნარმანიას სიტყვა კონფერენციაზე
„ადგილობრივი თვითმმართველობის ინსტიტუციების გაძლიერება“

ქალბატონებო და ბატონებო

ძვირფასო სტუმრებო

სასიხარულოა, რომ თბილისი მასპინძლობს ევროკავშირისა და ევროსაბჭოს ერთობლივი პატრონაჟით ორგანიზებულ კონფერენციას თემაზე «ადგილობრივი თვითმმართველობის ინსტიტუციების გაძლიერება».

კონფერენცია ჩვენი ქვეყნის დედაქალაქში იმართება ევროსაბჭოს ადგილობრივ ხელისუფლებათა კონგრესისა და თბილისის მერიის ორგანიზებით.

ჩვენ დიდად ვაფასებთ კონგრესისა და, მთლიანობაში, ევროპული თანამეგობრობის ძალისხმევას, – ადგილობრივი თვითმმართველობის პრობლემებზე ფართო და მრავალმხრივი მსჯელობის მიმარულებით, რადგან ამგვარი დისკუსია გვებმარება, ზუსტად განვსაზღვროთ და შევაფასოთ პრობლემები, დავსახოთ მათი გადაწყვეტის გზები, შევისწავლოთ სხვა ქვეყნების გამოცდილება და გავუზიაროთ საკუთარი გამოცდილება კოლეგებს. ამასთანავე, მუდმივად ვიმყოფებოდეთ იმ

პროცესთა მეინსტრიმში, რომლებიც თანამედროვე ევროპის განვითარებას განსაზღვრავენ.

დღევანდელ მსოფლიოში უმნიშვნელოვანესია, ხელისუფლება, მით უმეტეს, ადგილობრივი ხელისუფლება ზუსტად აცნობიერებდეს დროის მოთხოვნებსა და მნიშვნელოვან ტენდენციებს, რომელთაც შეიძლება მოახდინონ გავლენა ადამიანის, ყოველი ოჯახის ცხოვრებაზე.

ამასვე გვავალდებულებს ევროკავშირთან გაფორმებული ასოცირების შეთანხმება, რომლის ფილოსოფია ეფუძნება დემოკრატიული პროცესის მთლიანობის, უწყვეტობისა და ყოვლისმომცველობის პრინციპს.

ამ პროცესში არ შეიძლება იყოს წვრილმანი და მეორეხარისხოვანი საკითხები. უდავოა, რომ მოსახლეობის ყოფითი პრობლემების გადაწყვეტა უშუალოდ უკავშირდება ადგილობრივი თვითმმართველობის ინსტიტუტთა შემდგომ გაძლიერებას.

„ადგილობრივი თვითმმართველობის შესახებ“ ევროპული ქარტიის პრეამბულის თანახმად, მოქალაქეთა უფლება, მონაწილეობა მიიღონ სახელმწიფო საქმეების წარმართვაში, წარმოადგენს ერთ–ერთ ფუნდამენტურ დემოკრატიულ პრინციპს, რომელიც საერთოა ევროპის საბჭოს წევრი ყველა სახელმწიფოსათვის. ხოლო ამ უფლების პირდაპირი რეალიზაცია სწორედ ადგილობრივ დონეზეა შესაძლებელი.

რაკი ჩვენი დისკუსიის ერთ–ერთი საკვანძო თემა მერთა და სხვა ადგილობრივ ხელისუფლებათა პასუხისმგებლობაა, ხაზგასმით აღვნიშნავ, რომ ჩემი ღრმა რწმენით, არ არსებობს ამ პასუხისმგებლობის უზრუნველყოფის იმაზე ძლიერი და ქმედითი მექანიზმი, ვიდრე დემოკრატიული არჩევნებია.

კოალიცია «ქართული ოცნების» ხელისუფლებაში მოსვლის შემდეგ, ჩვენმა გუნდმა მიიღო კიდევ უფრო შორსმიმავალი, საპასუხისმგებლო გადაწყვეტილება და დღეს საქართველოს ყველა ქალაქს, ყველა მუნიციპალიტეტს უკვე არჩეული მერი თუ გამგებელი ჰყავს.

ეს პასუხისმგებლობა გვიბიძგებს, შევინარჩუნოთ მუდმივი კონტაქტი ამომრჩეველთან და, რაც მთავარია, შევქმნათ შესაბამისი ინსტიტუტები, რომლებიც მოსახლეობასთან მუდმივი ურთიერთქმედების მექანიზმებად იქცევა, ანუ უზრუნველყოფს ადამიანთა ყოფითი, სოციალური, საგანმანათლებლო, სამედიცინო თუ სხვა მოთხოვნების დაკმაყოფილებას.

ამგვარი მექანიზმებისა და მათი მუდმივი მოქმედების გარეშე, მხოლოდ არჩევითობაც კი არ იქნება საკმარისი, რათა ვუპასუხოთ დროის გამოწვევებს. დემოკრატიულად არჩეულმა ხელისუფლებამ ყოველდღიურად, საქმით უნდა ამტკიცოს, რომ კვლავინდებურად იმსახურებს ხალხის ნდობას და მუდმივად ზრუნავს ადგილობრივი თვითმმართველობის ორგანოთა მიმართ ამ ნდობის ამაღლებაზე.

ერთ–ერთი ყველაზე ქმედითი და აპრობირებული მექანიზმია მოსახლეობის ჩართულობა გადაწყვეტილებათა მიღების პროცესში, – სამოქალაქო საზოგადოების წარმომადგენელთა მონაწილეობა, მათი აზრის გათვალისწინება. აგრეთვე სამეცნიერო და ექსპერტული პოტენციალის სრულყოფილი გამოყენება, რისი შეუვალი აუცილებლობაც, ახლახანს თბილისში დატრიალებულმა ტრაგედიამ დაადასტურა.

ჩვენ არავითარ შემთხვევაში არ დავუშვებთ ასეთ კატასტროფულ შეცდომას, რომლის გამომწვევი სისტემური მიზეზი მნიშვნელოვანი პროექტების განხორციელებისას ინკლუზიურობის პრინციპის დარღვევა გახდა.

კონკრეტული მაგალითია ადგილობრივი თვითმმართველობის რეფორმის საკონსულტაციო საბჭო. არასამთავრობო ორგანიზაციათა ამ გაერთიანებასთან თბილისის მერია ნაყოფიერად თანამშრომლობს თვითმმართველობის ინსტიტუციური სრულყოფის პროექტთა შესამუშავებლად და განსახორციელებლად.

მნიშვნელოვანია, რომ წარმატებით მოქმედებს მოქალაქეთა რამდენიმე გაერთიანება, რომელთა წევრებს ქალაქის გულწრფელი სიყვარული და ერთგულება ამოძრავებთ. მათ შორის ერთ–ერთი ყველაზე აქტიურია «თბილისის ჰამქარი». არ დავმაღავ, ჩვენი თანამშრომლობა სულაც არ

არის უპრობლემო. ხშირად იგი ვითარდება ცხარე კამათის პირობებში, თუმცა, მთლიანობაში, სასარგებლო და შედეგიანია.

გარდა ამისა, ჩვენი გადაწყვეტილებით, არასამთავრობო ორგანიზაციები ჩაერთნენ მოხელეთა ატესტაციაში, რაც უზრუნველყოფს ამ პროცესის სამართლიანობასა და გამჭვირვალობას.

გრძელდება საბინაო ამხანაგობებთან ერთად ინფრასტრუქტურის თანადაფინანსების პროგრამა. ეს მუნიციპალიტეტისა და მოსახლეობის წარმატებული კოოპერაციის მაგალითია. თბილისის მერია ღიაა ამგვარი თანამშრომლობისათვის, მათ შორის ურბანული განვითარების საკვანძო საკითხთა განხილვის, ქალაქგეგმარების, ეკოლოგიისა და გამწვანების საკითხებში.

ადგილობრივი თვითმმართველობის უდიდესი ღირსებაა, რომ სწორედ მის ინსტიტუტებს ძალუბთ ყველაზე უკეთ გაითვალისწინონ მოსახლეობის ეთნიკური, რელიგიური, ისტორიულ-კულტურული და სხვა სპეციფიკა. ჩვენთვის ეს ერთ-ერთი პრიორიტეტია და მუდამ დიდი ყურადღებით ვითვალისწინებთ კიდევ ამ ასპექტს სამოქალაქო საზოგადოებასთან მუშაობისას – ტოლერანტობის იმ დიდი ტრადიციების გათვალისწინებით, რაც საუკუნეთა განმავლობაში ახასიათებდა საქართველოს დედაქალაქს.

განსაკუთრებულ ყურადღებას ვაქცევთ ახალგაზრდობასთან მუშაობას, რადგან ახალგაზრდობა ჩვენი საზოგადოების ყველაზე სოციალურად მობილური და კრეატიული ნაწილია. რაშიც კიდევ ერთხელ დავრწმუნდით ბოლოდროინდელი ტრაგიკული მოვლენების შედეგად.

ადგილობრივი თვითმმართველობის ამოცანაა, იქცეს მოხერხებულ «გამტარად» ხალხსა და სახელმწიფო ინსტიტუტებს შორის, რათა საზოგადოების ინიციატივა არათუ იკარგებოდეს, არამედ აუცილებლად აისახოს კონკრეტულ გადაწყვეტილებებში, განკარგულებებში, კანონებსა და კანონქვემდებარე აქტებში. მოქალაქეს არ უნდა უძნელდებოდეს, თავისი ხმა, შეხედულება, მოსაზრება, წინადადება მიაწოდოს მუნიციპალიტეტს და, რაც მთავარია, უნდა ჰქონდეს საშუალება, შემდგომ თვალყური ადევნოს მისი ინიციატის განხილვის, აგრეთვე შესაძლო რეალიზაციის პროცესს. ეს შექმნის «სინერგიას» საზოგადოებასა და ადგილობრივ თვითმმართველობას შორის, მაშასადამე, განამტკიცებს საძირკველს, რომელსაც ეფუძნება, მთლიანობაში, დემოკრატიული ქართული სახელმწიფო.

არ არის საკმარისი, ადგილობრივი ხელისუფლება მოქმედებდეს მოსახლეობის ინტერესებიდან გამომდინარე. აუცილებელია იგი მოქმედებდეს მოქალაქეთა სრული ჩართულობის პირობებში. წინააღმდეგ შემთხვევაში, თვითმმართველი ორგანო ადრე თუ გვიან აუცილებლად მოსწყდება ხალხს, იქცევა «ჩაკეტილ კორპორაციად» და ვეღარ შეასრულებს იმ მისიას, რომელიც მას კონსტიტუციამ დააკისრა:

უზრუნველყოს ეფექტური, პასუხისმგებელი და, ამასთანავე, მოქალაქესთან დაახლოებული მმართველობა.

გადაუჭარბებლად, ჩვენი თაობის მისიაა, გავაძლიეროთ, სრულყოთ ადგილობრივი თვითმმართველობა და ამით შევიტანოთ მნიშვნელოვანი წვლილი ევროპული საქართველოს მშენებლობაში. ამ მიზნის მისაღწევად კი, ნამდვილად არაფერს დავიმშურებთ.

დიდი მადლობა